

吳文節公遺集

吳文節公遺集卷二十五目錄

奏議

漕糧停運摺

平湖縣白糧改徵漕糧片

臺洋各米辦理情形摺

抵撥兵米片

籌補京倉片

撫卹口糧改放折色片

覆奏賑米聲抵銀數摺

吳文節公遺集卷二十五

男養原謹編

奏議

漕糧停運摺

奏爲浙省本屆應徵漕糧因災蠲緩所徵熟田米數無多籲懇

天恩俯准停運留抵丁船不敷口糧及南仁兵米等項
恭摺

奏祈

聖鑒事竊照浙江杭州等府所屬地方本年被水成災

業經

奏蒙

天恩將應徵地丁漕糧分別蠲緩在案茲據代理糧儲道徐敬會同藩司汪本銓詳稱浙省杭嘉湖三府所屬有漕州縣內如仁和錢塘海甯嘉興秀水嘉善海鹽石門桐鄉歸安烏程長興德清武康安吉等十五州縣應徵正漕暨隨徵行月食等米均已全行分別蠲緩僅有富陽餘杭臨安新城於潛昌化平湖七縣應徵熟田漕糧米四萬三千餘石又隨徵行月食等米七千餘石爲數無多前因向支額徵南米關放之滿緣各營兵米及

織造匠糧因災缺額不敷支給業已

奏明將新漕留抵撥補現在富陽等七縣所徵熟田漕糧四萬三千餘石自應詳請

奏懇停運留抵南乍兵米等項惟查浙幫漕白丁船一千二百一十四隻內除被災停運之永灑停造丁船八十隻不給口糧米石外此外輪減停雇全減各丁船一千一百三十四隻該本折各幫其例應一體支給行月食及苫蓋一半本色米三萬一千七百四十石除富陽等七縣約徵行月食米七千餘石又二十八年南糧餘耗年額徵存在倉抵給月糧米九千石二共米一萬六

吳文節公遺集

卷二十五

千餘石抵放外尙不敷行月食等米一萬五千七百餘石應請於富陽等七縣所徵熟田漕糧正耗米四萬三千石內截留抵給尙剩漕糧米二萬七千餘石留爲湊給南午兵米等項之需等情詳請具

奏前來

臣伏思漕糧爲

天庾正供當此京倉未裕之時何敢不力籌起運以資儲備無如本年浙省地方被災實重蠲緩較多熟田所徵爲數無幾而滿綠各營兵米及織造匠糧均爲計授要需向所動支之額徵南米亦因災缺額勢不得不留漕抵補該司道所詳委係實在情形合無仰懇

天恩俯准將浙省本屆漕船暫行停運所有富陽餘杭
臨安新城於潛昌化平湖等七縣徵收熟田漕糧米四
萬三千餘石以一萬五千七百餘石留抵丁船不敷口
糧其餘二萬七千餘石留爲奏濟南仁兵米等項之用
尙有不敷容臣與該司道等查明另籌辦理除咨明清
臣外所有浙省應徵熟田漕糧留抵丁船不敷口糧及
南仁兵米等項請免起運緣由理合會同漕運總督臣
楊殿邦恭摺具
奏伏乞

皇上聖鑒訓示謹

奏道光二十九年十二月二十日奏奉

硃批戶部議奏欽此

平湖縣白糧改徵漕糧片

再浙江省本屆應徵漕糧因災蠲緩所徵熟田米數無多現經

奏懇停運留抵丁船不敷口糧並南乍兵米等項惟查平湖縣本年應徵白糧粳糯正耗該起運米三千一百六十三石零又項下加三春辦米九百四十九石零本應一律徵收春辦祇緣本年浙西各屬被水較重有收田畝米質亦潮嫩細小春辦白糧難以挑選而鄰境江

蘇等省又同被災歉白糯米稀且全幫停運所放丁船不敷口糧及南乍兵米等項亦無庸以白糧抵放所有平湖縣本屆應徵白糧梗糯米石請以漕糧改徵俟下屆該縣應徵緩漕米內分別揀選購買仍以白糧交幫起運似此一轉移間庶

上供玉粒仍無短絀而於留撥兵精不無稍裕據藩司汪本銓代理糧道徐敬會詳請

奏前來臣覆核無異理合會同漕運總督臣楊殿邦附片奏

聞伏乞

聖鑒謹

奏道光二十九年十二月二十日奏奉

硃批戶部議奏欽此

臺灣各米辦理情形摺

奏爲查明臺灣各米到浙數目及辦理情形恭摺覆
奏仰祈

聖鑒事竊臣於本年十二月初一日接准部咨以浙省
賑米不敷請飭查臺灣等米會否到齊並再行文閩廣
等省趕運接濟等因奏奉

諭旨依議欽此欽遵行司查辦去後茲據藩司汪本銓

核議詳請具

奏前來

臣

查浙省被災各縣應給賑卹等米十二萬餘

石前經

臣

奏明以捐米抵放如有不敷酌動倉穀撥補計截至十一月底止共收捐米十一萬餘石現在尚有續到捐米數千石業經上倉統計賑撫所需足敷支放毋須另爲籌補至洋米一項前經

奏請由粵買運卽經兩廣督

臣

廣東撫

臣

飭委候選道

伍崇曜代買洋米一萬三千二百五十石運送到浙旋據甯紹臺道成齡逐包斛收實止米八千八百六十七

石稟經臣函詢廣東嗣准覆稱洋米向俱論磅與內地斗斛不能符合等因卽照浙省實收米數核算其所用價腳銀二萬三百六十五兩零計每米一石亦止合銀二兩二錢有奇較之內地米價尙爲輕減惟米質稍殊必須將內地之米拌食始能適口且海氣薰蒸不能久貯是以驗收後卽經咨明粵省停止購運其臺米一項節據鎮海平湖兩縣稟報米船進口不下七萬餘石臣恐米多價平商船失利不復前來當經飭司籌款轉發甯波府量爲收買以廣招徠嗣據甯波府稟報先後買米六千餘石餘米俱由各商自行投行出售現在北風

司令閩船到口者甚少體察市價日漸增昂已咨會督
臣轉飭臺灣道府諄勸商販源源接運俟有續到米船
隨時籌辦至前買臺洋各米共計一萬四千餘石原爲
接濟民食起見本可按價出糶歸還原欸惟因兵米匠
糧缺額甚巨現奉部議准採買三萬餘石是此項米價
均應作正開銷應將買運洋米價腳銀二萬三百六十
五兩三分四釐卽由粵省報部銷欸以免輾轉解運之
煩其由甯波運省所需水腳及收買臺米價腳細數仍
由浙省統歸採買案內核實造銷所有查明臺洋各米
到浙數目及辦理情形理合恭摺覆

奏伏乞

皇上聖鑒謹

奏道光二十九年十二月二十日奏奉

硃批戶部議奏欽此

抵撥兵米片

再浙省南糧因被災無徵缺額甚鉅臣於本年八月間奏請以半本半折均勻搭放茲於十二月十一日接准部咨以原議折放之數不敷養贍議請於一半折色內再給八成本色等因奏奉

諭旨依議欽此又先於十一月十五日奉准部覆浙省

不敷兵糧請以川米接濟現在川米不能碾運奏明另行籌補等因奉

旨依議欽此欽遵咨行到臣伏查浙省滿綠各營及織造匠役自本年九十月起至次年九月止應撥缺額米十三萬七千餘石原請半本半折搭放除以新漕留撥外動穀碾米二萬石再將川米酌留足敷五成本色之用現奉部議於折色內改放八成本色准再動穀碾米二萬石並採買三萬餘石以資抵放並因川米停運議以捐餘賑米改撥兵糧如有不敷仍於倉穀內動支補足多方籌備曲體兵艱自應遵照辦理惟查浙省當夏

兩成災以後糧價日騰不得不以民食爲先急籌平糶其時省倉應放兵米顆粒無存倉穀未便多支採買又需倍價各兵匠等計口授食均屬要需勢難懸待部文始行開放是以於八月間具

奏後卽以半本半折照案籌給行之數月均屬相安其在省滿緣各營應支次年正二月糧米向於十二月內關支亦經循照舊章預期折放計杭州滿營及臣標杭協等營由省倉經放者自九月分起至明年二月分止其餘兵米匠糧由各州縣經放者自十月分起至十二月分止其放過一半本色米二萬六千餘石此後應卽

遵照部議統以九成本色一成折色搭放計尙需本色正耗米七萬五千餘石若照部議碾穀及採買原數適足相當惟市價現尙增昂採買仍需巨款除臺洋等米一萬四千餘石業經收買現在

奏請作正開銷其餘應俟糧價稍平隨時酌辦至倉穀存數本屬無多明歲青黃不接糶濟之需尙須寬爲留備至溫處等屬水陸間阻盤運尤難卽酌量加增亦恐未能足數惟核計捐輸米石賑卹以外尙有盈餘自可收貯省倉全數抵用應俟捐輸截止後通盤確核再將碾穀及採買實數次第籌辦庶倉儲庫帑兩不虛糜而

兵食匠糧各無缺乏其本年未奉部議以前放過半折銀兩應請仍照前

奏歸本色米內一併造冊報銷據藩司汪本銓核議詳請具

奏前來 臣謹附片陳明伏乞

聖鑒謹

奏道光二十九年十二月二十日奏奉

硃批戶部議奏欽此

籌補京倉片

再 臣承准軍機大臣字寄道光二十九年十月二十八

日奉

上諭本年江浙安徽湖北等省被災之區均極寬廣江西湖南各地方亦多偏災現經各該督撫紛紛奏請蠲緩錢漕分別賑賞朕無不悉照所請立沛恩施因思來歲漕額減緩既多若不預爲籌裕京倉則三十一年北地數十萬人口食從何而出現在各省被災固多較重之區其並未成災者尙復不少僅恃蠲緩所剩之漕兌運北上尙濟何事爲此剴切諭知有漕各督撫各就地方情形或妥籌採買或勸令捐輸或由河運或辦海運就積貯之多寡酌米價之低昂總期源源運京補漕糧

之不敷裕倉儲於不匱中外同享樂利之休方慰朕意
斷不可心存畛域或推諉於幫費或藉口於歉年竟置
京倉短絀於不問該督撫經朕特簡封圻受恩深重當
此災重漕虧之時既應以本省籌畫爲急尤當以神京
拱衛爲先清夜捫心其能恬然自安乎勉之勉之朕將
拭目俟之矣將此各諭令知之欽此遵

旨寄信前來臣跪讀之餘莫名悚惕伏查浙省各屬向
止杭嘉湖三府徵漕兌運本年被災獨重蠲緩最多又
以滿緣各營兵米丁匠月糧在在皆須撥補不得不先
其所急懇請截留是卽蠲剩之漕雖爲數無多亦未能

北運正供缺額上塵

宵旰

臣

忝任封疆受

恩深重具有天良但得籌補之方何敢藉詞推諉竊思浙省人稠地狹漕額雖重產米無多日食所需半資客販非特不如湖廣亦併不及江安居民既鮮蓋藏市肆並無囤積夏間大雨經月道路阻隔商販不通民心皇皇頓虞乏食現在秋收稍獲補救第統計浙西成熟者十無二三瞬屆新春尙須另籌接濟溫臺等府幸稱中稔而挹注已多卽有餘糧亦恐爲數無幾且採買則市價騰涌無欸可籌運通則全漕皆停無幫可搭就浙省

而論籌辦較難而京倉未裕又何敢稍存膜視畏難苟
安查本年賑務酌放二成本色經

臣

奏准開局捐輸數月以來收米十餘萬石續據呈報者
尚不乏人現在蘇省已准部議捐米運通是捐輸米石
自當專以籌補京倉爲重應將浙省捐輸賑米卽於年
底截止仍另行設局勸捐運通以歸畫一溯查道光二
十七年奉文採買案內浙商購米十萬石係由上海附
達天津嗣因發價參差併歸江蘇專辦此次所收捐米
應由

臣

咨商江蘇督撫

臣

如援照成案辦理海運卽將

米色如何盤驗水腳如何加增會議章程一律照辦若

由河運雖層層牒壩阻隔人多視爲畏途如有殷實紳商肯自雇民船由內河轉運旣免風濤之險亦無海氣之蒸似於

天庾積儲尤爲妥善卽將所捐米石格外增算運腳以廣招徠倘內河運道通行川湖等省源源跟接庶缺漕可補倉貯可充矣其捐輸成例應否推廣變通及此外有無籌裕倉儲之法容更體察情形並飭司道等博訪妥籌再行隨時

奏辦所有停止捐輸賑米另行設局捐運京倉緣由

臣

謹附片具

奏伏乞

聖鑒訓示謹

奏道光二十九年十二月二十日奏奉

硃批戶部議奏欽此

撫卹口糧改放折色片

再查本年杭州等府屬被水乏食貧民分別應賑應撫
所有次重之餘杭新城平湖安吉山陰會稽蕭山餘姚
建德桐廬等十縣應行撫卹一月口糧照仁和等州縣
二三賑之例搭放本色二成折色八成前經

臣

奏奉

諭旨准行欽遵轉行查辦去後據各該管知府督縣查

明將應行撫卹各縣均經按照本色二成折色八成核實領給在案旋據紹興府知府徐榮轉據該郡紳董稟稱現在各鄉捐辦圖賑放米較多尙足敷衍而時值隆冬貧民無計禦寒需錢之急甚於需米請量爲變通全放折色等情由藩司汪本銓詳請具

奏前來臣查紹郡地近甯波轉輸較便前因海口商船一時紛集該紳董等奏捐購運積米尙多曾經藩司親詣察查山陰等縣捐辦圖賑本多放米之處所稟委係實在情形自可將該府屬之山陰會稽蕭山餘姚四縣應給撫卹口糧一律改放折色以順輿情除八成折色

銀兩業已飭發具領外其二成本色照例折價每石作銀一兩二錢計四縣共該銀一萬四千四百餘兩飭司在於備賑欸內照數動支給發該府領回分給各縣彙同散放事竣核實報銷所有紹屬山會蕭餘四縣撫卹口糧一律全放折色緣由謹附片具

奏伏乞

聖鑒謹

奏道光二十九年十二月二十六日奏奉

硃批戶部知道欽此

覆奏賑米聲抵銀數摺

奏爲奉查浙省被災地方搭放賑米聲抵銀數恭摺覆
奏仰祈

聖鑒事竊臣接准部咨以臣前奏通籌賑卹銀欸摺內
聲明擬於二三次賑及撫卹口糧內搭放本色米二成
約計需米十二萬餘石計可抵除銀十餘萬兩等情奉
部以捐輸案內收米一石作銀三兩三錢按十二萬石
核計應作銀三十九萬餘兩今祇抵除銀十萬餘兩是
每石僅止作銀八九錢較之收捐之數多寡懸殊已暗
擲帑金二十餘萬兩且將來各捐生以米合銀數目究
應作何核算請

旨飭令查明抵除之數與捐輸之數因何較少據實具奏等因奏奉

諭旨依議欽此咨行到臣伏查災賑定例每大口月給米一斗五升小口減半如放折色每米一石合銀一兩二錢溯查浙省前辦災撫成案初賑四賑全給折色次三兩賑搭放本色五成上年被水成災糧價昂貴待賑飢黎口食維艱若全數折銀實形拮据若別籌採運倍費支銷是以議請暫開捐輸賑米事例奉部核議准其每石作銀三兩三錢

奏奉

諭旨准行在案第統計災區如全給本色需米幾百萬石卽照成案於次二兩賑搭放本色五成亦需米三十萬餘石察看情形萬難足數復經

奏明僅於次三兩賑搭放二成本色其間如紹興府屬之山陰等縣因紳富糶米尙多被水情形亦稍輕卽將撫欵奏明全行改折不予本色以免折耗其留贖捐米抵放兵糧誠以民食不可不籌

國帑尤不可不節並不敢絲毫浮費暗擲帑金也茲奉戶部以約計搭放本色賑米十二萬石核計應作銀三十萬兩臣前摺奏稱抵除銀十餘萬兩多寡懸殊

行令查明覆奏等因臣查戶部所指之數係就捐生每米一石作銀三兩三錢計算臣前奏抵除之數係遵災賑定例每石合銀一兩二錢計算蓋捐米每石作銀三兩三錢原係按照時值價腳核實酌定而放賑折色每石例定一兩二錢數目本不相侔若折放本色亦按照捐輸米價合銀抵算則貧民所得愈少所抵轉多待哺災黎益形缺乏且溯查歷辦災撫成案或截漕撥放或碾給倉穀均就米穀本欸造報並不另計抵除價值捐米事同一律勢不能以捐生所作之銀數強符放給貧民之作價現在二三兩賑已將捐米動支搭放臣前奏

抵除之數係就銀欸約計容俟賑撫事竣再將實動銀
米各欸造冊送部聽候按例核銷至各捐生捐輸米石
前已經臣

奏請獎敘應懇

天恩勅部仍照奏准原案給予議敘以示鼓勵據藩司
汪本銓具詳請

奏前來臣覆核無異謹繕摺覆

奏伏乞

皇上聖鑒訓示謹

奏道光三十年正月二十七日奏奉

御批該部議奏欽此

吳文節公遺集卷二十八目錄

奏議

籲懇

節哀摺

審擬石門縣鬧漕匪徒摺

吳文節公遺集卷二十六

男養原謹編

奏議

籲懇

節哀摺

奏爲敬陳

暨

悲痛感戀下忱並籲懇

聖躬稍節哀情仰祈

聖鑒事竊

臣

於二月初二日准禮部咨驚知

大行皇帝龍馭上賓

臣

伏地哀號不知所措欽惟

大行皇帝御宇三十年

宵旰憂勤

厚澤深仁涵濡宇內猝遭

大故凡屬血氣之倫罔不號泣搶呼同深哀戀臣蒙

大行皇帝由編修用至卿貳外任封疆荷

恩尤爲深重泣憶自道光二十一年夏間赴江西巡撫
任時趨詣

闕廷親承

誨命嗣經兩次屆滿三年奏懇請

覲均欽奉

恩諭俟下屆再行奏請十載以來依戀之忱時縈寤寐

今竟無由再覲

天顏攀仰

鼎湖寸衷摧裂敬惟我

皇上至誠大孝超越恒常

悲痛之懷豈言詞所能喻惟是

鴻緒仔肩

付託至重四海之大萬幾之繁胥待

一人治理臣惟有籲求

皇上俯循禮制勉抑哀思上慰

在天顧復之靈卽下副薄海臣黎之望臣不勝哀痛籲

懇之至至

臣受

恩深重分應星奔叩謁

梓宮合無仰懇

皇上天恩准其來京稍伸犬馬依戀之忱如蒙

俞允

臣

卽將巡撫印務交藩司

臣

汪本銓暫行護理以

重職守瞻望

聖慈心神依跂謹瀝誠恭摺具

奏伏乞

皇上聖鑒訓示現在浙省地方安謐農田萊麥長發均極青蔥合併附陳謹

奏道光三十年二月初四日奏奉

御批知道了著毋庸前來欽此

審擬石門縣鬧漕匪徒摺

奏爲匪徒聚衆抗糧鬧漕拒捕致死兵役鄉勇審明定擬恭摺

奏祈

聖鑒事竊照石門縣地方於道光二十七年間有匪徒倪錫淋等抗糧滋事殺死兵役臣抵任後接據屍親具控查悉情形當將諱匿不報之府縣恭摺參

奏欽奉

上諭吳文鎔奏參諱匿命案之知縣及不行揭參之知府請分別革職降補一摺浙江前署石門縣丁憂知縣熊光煦於差出兵役被匪徒抗拒致斃並不查追屍身緝兇詳報迨丁憂卸事輒將卷宗私行抽匿荒謬之至熊光照着卽革職如訊有別項重情卽從嚴參辦現署嘉興府事甯波府知府徐瀛於所屬諱匿命案漫無覺察迨奉札查仍不揭參玩泄因循不勝知府之任着以同知歸部銓選倘查係知情徇隱並着一體嚴參餘着照所擬辦理該部知道欽此欽遵轉飭接署知府張印塘會營查拿各犯解究而倪錫淋陸三等復鬧漕滋事

又經臣飭委道府酌帶兵勇馳赴搜捕並將查辦情形
附片具

奏奉到

硃批從嚴查辦勿稍寬縱欽此旋據該府縣拏獲陸三
等各犯解省並據倪錫淋以倪桂昌出名赴京在都察
院衙門捏情呈控遞回訊辦經臣發委杭州府知府徐
敬確審茲據該府審擬由署臬司蔡瓊藩司汪本銓會
同覆審轉解前來臣親提各犯逐一研訊緣倪錫淋卽
倪桂昌陸三彭添保沈三順張正發金添球沈景高沈
泳桂張茂菖胡景峯王正揚倪樸成徐雲發沈茂生陸

鴻來彭勝才均籍隸石門縣陸效忠原籍歸安縣鄭起發原籍海甯州均寄住石門倪錫淋居住仰家兜地方陸三居住花埠地方平日武斷鄉曲人皆畏懼該縣徵收漕糧向來大戶輸納本色其零星小戶按照時價設櫃折徵官爲買運歷久循照辦理道光二十七年十一月間倪錫淋因秋收歉薄起意借端約會抗糧歛錢漁利商同已故伊父倪再豪在逃伊弟倪錫菖倪恒菖并現獲之陸三陸效忠彭添保沈三順及監斃之沈起發在逃之彭錦發陸臣鼎四處散貼傳單不許村民赴縣完納當經前署縣熊光煦訪聞並據庫書李象賢等具

稟到縣熊光煦於十二月初四日飭差陳庭張秀移營
撥兵吳慶瑞分路查拏陳庭吳慶瑞前至仰家兜地方
倪再豪抗拒不服主使倪錫淋等將該兵役捉拏拷打
倪錫淋用鐵鋤毆傷吳慶瑞右太陽腰眼彭錦發用鐵
鋤毆傷陳庭額顙左腿陸三倪恒菖沈起發在場助勢
陳庭吳慶瑞因傷殞命倪錫淋陸三等將各屍身擡至
高橋河內撩棄滅跡張秀先在花埠地方查拏風聞前
情稟經熊光煦添差勒緝一面雇令鄉勇端沅昭赴鄉
查尋兵役屍身二十八年二月十三日端沅昭尋至仰
家兜村內被彭錦發路遇盤獲主使陸三用木扁擔毆

傷其左臂陸效忠用鐵鍬毆傷其左腿肚腰眼肚腹身
死邀同倪錫菖沈起發用石細縛屍身擡至五湖涇河
內掠棄滅跡熊光煦因鄉勇日久未回復經添差嚴緝
獲到倪錫淋彭添保訊供狡展稟經前署府徐瀛批飭
提郡督審倪錫淋等堅不承認並稱陳庭等係被倪再
豪彭錦發拉至花埠地方關禁並未致死現在不知去
向情願跟交倪再豪等到案質審等語再三刑訊堅執
不移徐瀛卽飭熊光煦將倪錫淋等帶回押令跟交倪
錫淋彭添保先後患病呈請省釋熊光煦以陳庭等既
據倪錫淋等供明並未致死批准暫行釋回醫治仍勒

限跟交一面選派家丁雇覓眼線四處訪查詎倪錫淋於釋回後卽向仰家兜花埠各戶勒派抗糧費用每田一畝須錢四十五文如不依允拆屋驅逐有鍾鼎沅顧老加沈聚才及姚姓陸姓等家不肯出錢倪錫淋糾同陸三等將其房屋拆毀從此各村民畏兇勉從倪錫淋其歛得錢二千餘串交倪再豪沈起發經收支用並用木椿釘伏河道併製造鐵槍木棍等項器械以爲抗拒官兵之計惟時熊光煦丁憂卸事因前次飭查之丁役眼線人等迄未回縣稟報當將卷宗攜帶赴郡面稟徐瀛商辦卽經前臬司訪聞札查徐瀛奉文轉行一面查

案稟辦問卽據陳庭堂弟陳汝英赴臬司及臣衙門具
控批行接署縣陸之棟移取原卷查案稟覆經臣將該
署府徐瀛該署縣熊光煦專摺

奏參奉

旨分別降補革職等因欽此欽遵行司飭令接署府張
印塘會營選雇兵勇前往督拏倪再豪潛赴省城探聽
消息經委員候補知縣張家縉會同仁錢二縣訪獲到
案因病未能取供旋卽在押身死倪錫淋等聞風挈眷
逃匿所有該村良民先因被害移徙他鄉張印塘會督
營縣于十一月十三十四等日親赴仰家兜花埠兩莊

搜捕在途偵獲寄居該村之客民諸雲祥詢知匪徒聞風先遁因周厯兩莊之中令諸雲祥指出倪錫淋等著名各匪徒住屋逐一擣毀此外民居並不絲毫騷擾當將兵勇裁撤倪錫淋陸三探知兵勇已撤潛復聚集村內十二月初間該縣開倉徵收漕糧陸三起意鬧漕商同倪錫淋陸效忠并糾允現獲之彭添保沈三順監斃之沈起發蔣受幅蔣景發倪添隴馮大良拒捕格斃之陸舊忠在逃之彭錦發陸臣鼎彭泳加徐雲高徐幅謙分赴仰家兜花埠兩莊鳴鑼糾人聲言如有不到定行殺害當有現獲之張正發金添球沈景高沈泳桂張茂

曹鄭起發徐雲發沈茂生陸瀾來彭勝才監斃之陳泳
發沈幅年沈勝才顧啟才在押病故之顧長堯在逃之
蔡阿八蔡玉才朱癩頭及不識姓名村衆被脅同行約
其四五十人於是月十四日黎明分駕小船連鯨進城
陸三喝令將完糧船隻一概逐回陸之棟馳往彈壓獲
住徐雲發沈茂生二名陸三起意拒捕與沈三順沈起
發彭錦發陸臣鼎上前吶喊張正發金添球沈景高沈
泳桂張茂曹鄭起發陳泳發沈幅年沈勝才同不識姓
名人在場助勢陸瀾來彭勝才顧啟才顧長堯與蔡阿
八等先因畏懼逃回當有汎弁典史踵至奮勇協拏又

阿大一名赴縣稟究捏爲諸村老獲盜送縣反被官押
復添捏該府縣帶領兵勇進村砍伐桑枝燒燬民房縱
兵擄掠及糧戶入城完米被縣書金音先等焚燒米船
主分衣服各情節並撫拾仰再興等上控各案任意羅
織添砌令陸臣鼎寫就呈詞自以倪桂昌出名潛赴都
察院衙門呈控咨解回浙發委杭州府知府徐敬訊辦
並飭該府將倪錫淋京控各情親赴石門逐一確查併
會督該府縣查起陳庭等各屍身審明究辦去後嗣據
徐敬會督該府縣在於高橋五湖涇河內飭差連日打
撈屍身因該處水深湍急且越時已久各屍骨漂流無

著無從起獲一面查明該縣書役人等並未開設糧店
違例勒折焚燒米船上年該府縣會營督帶兵勇前赴
仰家兜花埠兩莊查拏匪徒亦無砍伐桑枝燒燬民房
縱兵擄掠及鄉民獲盜送縣被押各項前事地保朱道
南已經病故吳有恒並非革役復充飭傳監生胡亮采
縣書金玉堂革書曹洪擎等赴省投案並據參員熊光
煦呈送親供集訊詳解案犯朱泳才顧長堯二名亦在
監在押病故委驗詳報並由司將倪錫淋等各犯覆審
解勘前來臣親提研鞫據供前情不諱臣以倪錫淋陸
三聚眾歛錢抗糧鬧漕並製造器械迭次抗拒官兵實

屬愍不畏法恐難保無謀逆重情且恐同謀者亦不止
陸效忠等數人復向各犯再三嚴詰據倪錫淋陸三供
稱伊等糾約抗糧鬧漕意在歛錢漁利因被鄉勇兵役
往挈慮恐獲案問罪是以糾衆拒捕委無謀逆情事同
夥者實止陸效忠等數人此外皆係脅從等語研詰至
再矢口不移案無遁飾查例載刁民假地方公事強行
出頭逼勒平民約會抗糧聚衆聯謀歛錢構訟者照光
棍例爲首擬斬立決爲從擬絞監候被脅同行者各杖
一百又犯罪事發官司差人拘捕如有逞兇拒捕殺死
差役者爲首無論謀故毆殺俱擬斬立決爲從毆殺下

手傷重致死者擬絞立決但係幫同下手不論手足他物金刃擬絞監候在場助勢未經幫毆成傷者改發極邊足四千里充軍又例載主使人毆打致死者以主使之人爲首下手之人爲從論又例載驀越赴京告重事不實并全誣十人以上者發邊遠充軍又例載知人犯罪事發藏匿在家不行捕告者減罪人罪一等又棄屍水中者杖一百流三千里又例載毆故殺人案內兇犯起意棄屍水中其聽從擡棄之人無論在場有無傷人俱照棄屍爲從律杖一百流三年又例載犯罪拒捕於本罪上加二等各等語此案約會抗糧歛錢聚眾訊係

倪錫淋起意爲首糾衆進城阻漕滋鬧訊係陸三起意
爲首厥罪惟均俱應按例問擬倪錫淋除聽從拒毆兵
丁吳慶瑞致死下手傷重罪止絞決陸三除幫毆鄉勇
端沅昭致死下手傷輕罪止絞候及該犯等棄屍滅跡
並倪錫淋捏情京控罪止軍流各輕罪不議外倪錫淋
卽倪桂昌陸三均合依刁民假地方公事强行出頭逼
勒平民約會抗糧聚衆聯謀歛錢搆訟者照光棍例爲
首擬斬立決例擬斬立決陸效忠聽從倪錫淋陸三糾
約抗糧鬧漕罪止絞候其聽從彭錦發主使毆斃鄉勇
端沅昭下手傷重罪應絞決自應按例從重問擬陸效

忠除聽從糾約抗糧鬧漕輕罪不議外合依犯罪事發
官司差人拘捕如有逞兇拒捕殺死差役爲從幫毆下
手傷重致死者擬絞立決例擬絞立決彭添保沈三順
等聽從同謀抗糧鬧漕或散貼傳單鳴鑼糾人或幫逐
米船隨同滋事罪亦惟均除沈起發蔣受幅蔣景發倪
添隴馮大良業已監斃陸菖忠業已格斃均毋庸議外
彭添保沈三順均合依刁民假地方公事强行出頭逼
勒平民約會抗糧聚眾聯謀歛錢構訟爲從擬絞監候
例擬絞監候張正發等被脅同行鬧漕均各在場助勢
殊屬玩法自應酌量問擬除陳泳發沈幅年沈勝才業

已監斃毋庸議外張正發金添球沈景高沈泳桂張茂
莒鄭起發應於陸三斬罪上量減一等各擬杖一百流
三千里胡景峯等訊未隨同抗糧開漕惟于陸三等被
挈時被逼聽從拒捕亦應按律問擬除朱泳才沈泳生
業已監斃毋庸議外胡景峯王正揚倪樸成應于被脅
同行杖一百罪上加拒捕罪二等各擬杖七十徒一年
半徐雲發等被脅同行並未幫同滋鬧除顧長蕘顧啟
才業已病故毋庸議外徐雲發沈茂生陸鳳來彭勝才
均合依被脅同行者杖一百例各擬杖一百該犯等事
犯在道光三十年正月二十六日恭逢

恩赦以前除罪應斬決之倪錫淋陸三罪應絞決之陸效忠情罪重大均應不准援免外其問擬絞候之彭添保沈三順二名聽從抗糧開漕情節較輕原引例牌係照光棍爲從問擬與實在光棍爲從者不同應請准予援免張正發金添球沈景高沈泳桂張茂菖鄭起發被脅同行開漕胡景峯王正揚倪樸成被逼聽從拒捕徐雲發沈茂生陸瀾來彭勝才被脅同行並未幫同滋事所擬流徒杖罪均應准予援免如釋免後再行滋事犯法卽照所犯之罪加一等治罪倪再豪商同約會抗糧並主使毆打兵役陳庭吳慶瑞致死計上其容留陸三

等均有應得罪名業已病故應毋庸議壯勇王四等傷已平復應與訊係無辜之諸雲祥均毋庸議各犯在監在押取保病故刑禁看役保人訊無凌虐情弊縣書金玉堂金音先等訊無開設糧店違例勒折及燒燬米船主分衣服各情事應與無干之監生胡亮采亦毋庸議仰再興仰虹橋等上控縣書指給由單核與此案無涉應飭該府縣查明另行詳辦金玉堂等家被毀房屋業由該府縣捐廉撫卹起獲器械船隻飭令移營配用該犯等歛得錢文飭追償還各屍棺給屬領埋逸犯彭錦發等飭緝獲日另結監斃職名飭取另參前署石門縣

知縣熊光煦於差出兵役被匪徒拒傷致死先經訪拏稟府提審因倪錫淋誑供該兵役係倪再豪彭錦發拉至花埠地方鬪禁並未致死准其暫行釋回仍勒限跟交嗣該署縣丁憂卸事因尙未查明兵役下落無從詳報攜帶卷宗面稟該府商辦並非抽匿卷宗有心諱匿亦無別項規避重情惟似此重案並不將查辦緣由先行通稟且前獲倪錫淋等不能研審得實遽行釋放辦理殊屬荒謬業已革職應毋庸議前署嘉興府知府徐瀛先因案無端倪未經揭報尙非知情徇隱惟該縣先獲倪錫淋等解郡並不虛衷督審究出實情率令帶回

實不勝知府之任前已欽奉

諭旨以同知降補應給咨赴部銓選除備錄供招咨送
刑部並咨吏部查照外所有審擬緣由理合會同閩浙
總督臣劉韻珂恭摺具
奏伏乞

皇上聖鑒勅部議覆施行謹

奏道光三十年二月二十七日奏奉

御批刑部速議具奏欽此

吳文節公遺集卷二十七目錄

奏議

遵保屬員摺

動撥米石摺

資遣軍船水手摺

吳文節公遺集卷二十七

男養原謹編

奏議

遵保屬員摺

奏爲遵

旨保舉屬員仰祈

聖鑒事竊

臣

接准部咨道光三十年二月十四日奉

上諭直省司道府廳州縣以及營伍員弁內各督撫見聞所及隨時察看自必知之最悉如查有才德兼優誠心任事確有實據者著出具切實考語秉公具摺酌保

數員候朕簡用其有貪婪不法以刻爲明或年老昏愎不能辦事者亦著據實叅奏不准姑容等因欽此仰見皇上任賢去邪勤求郅治臣跪讀之下不勝欽感伏念爲政首在安民而安民必先察吏臣蒙

先皇帝恩遇由編修用至卿貳外任封疆夙夜戰兢刻以察吏安民爲先務故於所屬大小各員時時留心考察其官聲平常難期振作或年力衰頹不堪驅策者均經隨時

奏叅不敢稍事姑容其才德兼優誠心任事堪膺保舉者合竇缺及候補曾經署事人員謹就臣察識所及臚

舉實蹟出具考語酌保數員伏候

採擇以冀仰副我

皇上旁求俊乂佐治安民之至意至藩臬兩司係統轄
通省大員尤關緊要查現任藩司汪本銓體用該備才
識俱超應務極明敏而復能精細率屬極嚴正而不失
和平事無鉅細罔不籌畫周詳現任臬司黃宗漢廉以
持躬勇於任事以誠懇待人以嚴明察吏實事求是詳
慎精勤浙省諸務積疲已久該司等均能實力挽回勵
精求治就臣所見該二員均可膺重寄除府廳知縣擬
保四員另繕清單恭呈

御覽外所有藩臬兩司足膺保舉理合一併出具考語
據實上

聞爲此恭摺具

奏伏乞

皇上聖鑒訓示謹

奏

杭州府知府余士璫

該員年五十一歲安徽進士以卽用知縣分發浙

江曾任西安秀水仁和等縣道光二十五年奉

特旨升廣東嘉應州知州旋奉

旨升補杭州府遺缺知府遵經

奏補嘉興府知府現任經臣奏調杭州府知府該員歷

任浙省繁要之缺素著循聲捕務亦極講求署廣
東南雄州任內獲盜多名

奏明有案上年抵嘉興府任正值災象初成率屬籌賑
勸捐事必躬親耐勞任劇措置得宜洵屬才猷卓
練實心任事之員

准升定海廳同知畢承昭

該員年四十三歲山東拔貢

朝考二等以知縣籤分浙江曾任餘杭鎮海各縣及署

鄞縣知縣升補定海廳同知該員才具優長心地醇正定海孤懸海外間有夷民交涉事件均能因時制宜措施得當現在委令督理捐造營船事務尤能任勞任怨事事講求實際洵屬有體有用結實可靠之員

候補知縣段光清

該員年五十歲安徽舉人甲辰科大挑分發來浙曾署建德慈谿等縣現署海鹽縣缺該員才識遠大惻惻無華歷署各縣俱能盡心民事輿論允孚上年海鹽縣被災綦重該員於五月間卽扁舟冒

兩周歷各鄉以安撫爲稽查一切民困之重輕賑撫之次第不動聲色已胸有把握及設局籌辦日日與紳士會商亦日日與鄉民接見故辦理井井有條民情亦翕然愛戴洵屬體用兼備有爲有守之員

坐補嘉興縣現署錢塘縣知縣楊裕深

該員年五十歲貴州進士前於嘉興縣任內告病開缺嗣病痊引

見奉

旨照例坐補原缺現署錢塘縣缺該員才具開展勇於

任事歷署海甯仁和歸安等州縣皆係賦重事繁
素稱難治之區該員辦理裕如民情悅服緝捕亦
極有方前署歸安縣任內曾獲鄰境盜犯多名

奏准送部引

見在案洵屬實心實力肆應有爲之員

道光三十年四月十九日奏奉

硃批知道了單留覽欽此

動撥米石摺

奏爲遵

旨動撥捐輸等米分別抵放南糧並盈餘米石存俟冬

漕搭運緣由恭摺

奏祈

聖鑒事竊照浙省上年應徵漕糧無多留抵丁船月糧
及湊給南乍兵匠等米請免起運緣由前經臣會同漕

臣恭摺具

奏欽奉

硃批戶部議奏欽此嗣准部咨浙省二十九年應征漕
糧米石除抵給幫丁月糧外尙剩漕米二萬七千餘石
准其一併截留分別造報其湊給南乍兵匠等米卽於
三十年徵收南米項下照數提還交幫搭運不得顆粒

短少并飭將上年清查案內各屬挪缺漕米三十萬石有零果否籌補抑俟何年起限確切查明據實具奏又議覆籌補京倉米石統歸蘇省呈捐浙省無須另辦海運惟兵匠米糧抵放不敷應於捐輸賑米截止後另行設局勸捐先儘支放兵米之用如有盈餘留交下屆幫船搭運赴通照案請敘等因于道光三十年二月初六日具

奏奉

旨依議欽此卽經轉行欽遵去後茲據藩司汪本銓糧道胡元博會詳稱浙省滿緣各營及織造匠糧自上年

九十月起至本年九月止應撥缺額正耗米一十三萬七千餘石除搭給折價銀兩應于地丁項下支銷外所需本色米石前奉部議准令採買三萬石倉穀碾米四萬石當因倉穀實貯無多採買需款較鉅請俟捐輸截止通盤確核次第籌辦業經

奏明在案伏查賑案捐輸截至上年年底共收米一十七萬二千六百餘石除支放賑撫口糧米十萬九千八百餘石外計餘剩米六萬二千八百餘石加以上年秋季已動倉穀碾抵米一萬八千八百九十餘石又採買臺洋米一萬四千八百六十餘石又杭嘉二屬截留漕

白米三萬一千八百餘石共米一十二萬八千餘石內
已撥給上年九十月起至本年四五月分止滿緣兵糧
五成及九成正耗米六萬九千八百七十餘石又應抵
給本年六七月至九月止滿緣兵匠九成正耗內省倉
支放俸糧每月起住多寡不同約略核計該米二萬九
千二百餘石統已未給共需米九萬九千餘石尙有盈
餘米約三萬石應卽遵奉部行加謹收貯歸于本年冬
漕交幫搭運至另行設局收捐一節戶部原爲籌備兵
糈起見今本省兵糧足敷支放冬漕搭運爲期尙寬現
雖二麥已登而米價未能平減且經霉厯夏時日較多

深恐久貯之餘不無折耗所有捐米之案應請暫行停止仍俟秋成後察看情形另行

奏明辦理至缺額南米動支留漕抵補內蠲免米石例應作正開銷緩帶米石應俟按限徵起分年還漕搭運浙省上年各屬被災過重蠲帶較多卽有歉收緩徵及成熟並緩米石尙應抵給今冬省乍兵匠額糧并來年幫船起運月糧之欸勢難於三十年徵收南米內一律歸還漕糧搭運交通應請循照向例在於緩帶項下各按起徵原限分年帶徵還欸此外動支倉穀及臺洋捐輸等米除蠲免米欸照例作正開銷外其餘緩帶南米

仍俟屆限徵起分別還倉搭運以歸核實又清查案內各屬挪缺漕米三十萬石有零遵照原議分作六年籌補上年因清查分任各冊未經造報難以著追現在將次造齊即可咨部起限應請自三十年冬漕爲始每年搭運米五萬石交通以符

奏限而重倉儲等情詳請具

奏前來

臣

詳加覆核均係實在情形除飭該司道等將

賑撫口糧及抵給丁船月糧南乍兵米暨採買臺米價銀各歸各案分別造冊另行咨部查核外所有撥動米款及盈餘米石存俟搭運緣由謹恭摺具

奏伏乞

皇上聖鑒訓示謹

奏道光三十年五月十二日奏奉

硃批戶部議奏欽此

資遣軍船水手摺

奏爲浙省回空軍船水手遵

旨資遣完竣並籌款動給緣由恭摺具

奏仰祈

聖鑒事竊照上年浙省有漕州縣被水成災經臣察看

情形以新漕勢難征收起運各船游幫水手人數眾多

亟須預籌遣散

奏奉

諭旨應如何設法分起遣散著陸建瀛傅繩勛吳文鎔
會同楊殿邦妥商會議具奏等因欽此嗣經漕運總督
臣楊殿邦會同兩江督臣江蘇撫臣暨臣將會商辦理
緣由奏明欽奉

諭旨各船有名舵水將來到次派減並著吳文鎔查照
章程妥速資遣不准逗遛擾害等因欽此欽遵札飭糧
道妥爲籌辦查上年浙省回空軍船均於十一月渡黃
因運河淤塞分泊太平汪守水度歲丁舵日食維艱先

經漕

臣

奏明籌款每船借給銀十五兩由糧道解還歸款在案
嗣至本年開春河水間段尙有淺阻船行艱滯臣卽飭
糧道胡元博馳赴江口一帶上緊設法催提杭嘉各幫
丁情雖形困頓尙能借貸支持惟湖屬各幫疲乏尤甚
船內器具多付典質勢在斷炊卽經該道查明乏食各
船沿途購買米石給與口食嚴督催僱南下於三月二
十二日始全行歸次經臣先事檄飭各該地方文武嚴
行稽查彈壓一面飭該糧道預爲籌款一俟幫船到次
卽分投按幫妥速資遣毋任逗遛去後茲據該糧道胡

元博會同藩司汪本銓詳稱查歇運糧船資遣水手並無本款可動溯查道光三年杭嘉湖三府被水成災減運幫船水手每名給發資遣錢三千文有案惟彼時災情較輕成熟各縣漕糧仍多起運每幫減船一二十隻不等資遣錢數有限是以均由各縣籌捐及各幫丁自行捐資協貼辦理本屆全幫停運計杭嘉湖三府屬回空軍船八百六十九隻每船在冊舵水十名共計八千六百餘名仿照道光三年成案每名舵水給予遣費錢三千文約需錢二萬六千餘串爲數不貲各幫丁既無出運之潛力量已形竭蹶兼之上冬今春在途花用較

多現已無從措辦各縣亦未能籌此鉅款至道庫本無
閒款且當此力求節慎之時亦未敢輕言籌撥再四思
維惟查有富陽餘杭臨安新城於潛昌化平湖等七縣
留漕抵給月糧核計節省給丁漕截銀四千七百餘兩
又各縣應征輕齎銀五千六百餘兩無庸起解二共銀
一萬三百餘兩儘提銀一萬兩抵放資遣之需其不敷
錢數千串仍飭由各縣籌捐奏給以本屆節省之漕項
爲本屆歇運之用可無庸另行籌款且查與二十一年
軍需案內截留漕米其漕截銀兩於二十二年

奏准動給調劑減丁之成案相符等情詳請具奏前來

臣覆加確核委係實在情形合無仰懇

天恩俯准在於留漕節省銀內儘提銀一萬兩抵放資遣水手之用作正開銷現在已由該道將前項銀發給杭嘉湖三府照時價易換制錢彙同各縣捐項按幫分散資遣完竣各船水手一律遣散淨盡各回本籍並無在境逗留潛匿之事地方均極安謐所有浙幫停運水手資遣完竣並籌款動給緣由謹會同漕運總督臣楊殿邦恭摺具

奏伏乞

皇上聖鑒訓示謹

奏道光三十年五月二十三日奏奉

硃批戶部議奏欽此